



Sabtu, 30 Desember 2023
Ogen: Yakobus 5:7-8



Sabar Ngayak Reh Tuhan



Hari kemaren sudah hilang, hari esok belum datang; kita hanya memiliki hari ini, mari kita mulai. Bage sada kata motivasi siibelasken Bunda Teresia. Wari sinderbih lanai bo terulihni kita, enggo bene kerina kesempatan si lit. Si banci sialoken e me ulih silakoken kita dengen kerina terjeng jadi ingeten nari. Dingen wari si pagi langa bo reh, ntah jadi sikerajagenta pe langa bo si eteh, seh nge kita ku paksa e pe langa tentu. Wari si sendah nge sikerajagenta, si banci sipake, sinanami dengen sipekena kai silanga payo i bas paksa si lepas. E maka nina kalak pentar ka, ula terkari-kari, ula terpagi-pagi, lakokenlah, bahanlah kai sibanci ilakokendu i bas wari si sendah.

Bagenda me Jakob i bas suratna man kalak Kristen paksa e alu erbahan andingen kerna sekalak perjuma si alu kesabarena i bas ndahiken dahinna. Saber ia nimai ulih kai siidahikenna, saber ia nimai udan gelah banci merdang dengen guna page rumpah. Kata e ngajuk kalak sierkiniteken ersaber ate nimai kerehen Tuhan. Kalak si saber e me kalak si erpengarapen, nimai alu dem arapen kerna wari sipepagi. E me wari si dem pengarapen, wari sipepagi ulin nge asangkan wari si sendah. Alu bage ergiah-giah kita nimaisa, ndalanisa dengen berkarya asa ngasup gegehta. I bas waktu ras kesempatan si ibereken Dibata man banta. Seh kerehen Dibata mulihken. La si eteh ndigan tapi i bas kesabaren e, ndigan pe seh warina enggo sikap kita, sabap wari si sendah ngenca sikerajagenta, pakeken alu mehuli, ersikaplah tetap dikune genduari ia reh. La kita ketunduken, sikap kita.

Bagenda me i bas penghujung tahun 2023 enda, sikataken bujur man Tuhan kerna paksa-paksa si enggo si aloken, sidalani, bujur ibas wari si sendah banci sinanami dengen tetaplah kita erpengarapen kerna wari si pepagi.